



კაცური კაცის თვისებებით ენგურის ნაპირებიდან მეცნიერების მწვერვალამდე



არიან ადამიანები, რომლებიც არ ხმაურობენ, მაგრამ საზოგადოებისათვის კარგ საქმეს აკეთებენ, არ ხმაურობენ, მაგრამ დიდ ეროვნულ საშვილიშილო საქმეს აკეთებენ. ასეთ ადამიანთა რიცხვს მიეკუთვნება ეკონომიკურ მეცნიერებათა დოქტორი, საქართველოს ბიზნესისა და ეკოლოგიის მეცნიერებათა დოქტორი, საქართველოს ბიზნესისა და ეკოლოგიის მეცნიერებათა აკადემიის აკადემიკოსი, ღვაწლმოსილი პროფესორი, ყველასათვის საყვარელი პიროვნება **პარმენ ლემონჯავა**, რომელიც უღამაზეს სოფელ

ჭუბურხინჯიდან კაცური კაცის თვისებებით დასახურებულად ასულია მწვერვალამდე, სადაც მრავალი საპატიო ადგილია, მაგრამ ყველა ვერ აღწევს.

ამჟამად პროფესორ პარმენ ლემონჯავას, რომელიც მუშაობს საქართველოს ტექნიკური უნივერსიტეტის ბიზნესინჟინერინგის ფაკულტეტზე, 80 წელი შეუსრულდა.

პროფესორ პარმენ ლემონჯავას გამოქვეყნებული აქვს 80-ზე მეტი სამეცნიერო ნაშრომი, მათ შორის: ოთხი სახელმძღვანელო და ხუთი



მონოგრაფია. მას სახელმძღვანელოსათვის „ბუნების გამოყენების ეკონომიკა“ – მინიჭებული აქვს ივანე ჯავახიშვილის სახელობის თბილისის სახელმწიფო უნივერსიტეტის სამეცნიერო პრემია. ის იყო ჟურნალ „სოციალური ეკონომიკის“ რედაქციის წევრი, ამჟამად კი არის ჟურნალ „სოციალური ეკონომიკა – XXI საუკუნის აქტუალური პრობლემების“ რედაქციის წევრი და ამ ჟურნალის რედაქტორის მოადგილე. დაჯილდოებულია ღირსებისა და ნასენი და ყამირი მიწების ათვისებისათვის ორდენებით. პროფესორი პარმენ ლემონჯავა ჯერონად ათავსებდა პედაგოგიურ-მეცნიერულ მოღვაწეობას სამეურნეო პრაქტიკულ საქმიანობასთან. იგი ხანგრძლივი დროის განმავლობაში იყო სსრ კავშირის მშენებანკის საქართველოს რესპუბლიკური კანტორის მუშაკი, საქართველოს სახელმწიფო დაწესებულების მუშაკთა პროფკავშირის რესპუბლიკური კომიტეტის სამი მოწვევის მდივანი, ივ. ჯავახიშვილის სახელობის თბილისის სახელმწიფო უნივერსიტეტის ეკონომიკის ფაკულტეტის დეკანის მოადგილე, ამავე ფაკულტეტის ორი მოწვევის სადისერტაციო საბჭოს სწავლული მდივანი. მას გავლილი აქვს მოსკოვის ლომონოსოვის სახელობის სახელმწიფო უნივერსიტეტის კვალიფიკაციის ამაღლების კურსები, მონაწილეობდა სხვადასხვა საერთაშორისო მნიშვნელობისა და ადგილობრივ საერთაშორისო კონფერენციებში.

პარმენ ლემონჯავა დაიბადა საქართველოს ერთ-ერთ მშფოთვარე მდინარე ენგურისა და შავი ზღვისპირა მდებარე უღამაზეს სოფელ ჭუბურხინჯში.

პარმენ ლემონჯავამ 1954 წელს დაამთავრა გაღის რაიონის სოფელ ჭუბურხინჯის საშუალო სკოლა, ხოლო 1960 წელს კი სტალინის სახელობის თბილისის სახელმწიფო უნივერსიტეტის ფაკულტეტი. 1962-68 წლებში იყო ივ. ჯავახიშვილის სახელობის უნივერსიტეტის ასპირანტი. 1970 წელს დაიცვა ეკონომიკის მეცნიერებათა კანდიდატის, ხოლო 1990 წელს კი ეკონომიკის მეცნიერებათა დოქტორის სამეცნიერო ხარისხი. პარმენ ლემონჯავას 1989 წელს მიენიჭა პროფესორის წოდება.

პროფესორ პარმენ ლემონჯავას კვლევის ძირითადი მიმართულებებია: ეკონომიკური თეორიის, ბუნების გამოყენების ეკონომიკური თეორიისა და პრაქტიკული გამოყენებისა და საბაზრო ეკონომიკის პრობლემები. მისი კონსულტაციითა და ხელმძღვანელობით შესრულებულია

და დაცულია რამდენიმე სადოქტორო და საკანდიდატო დისერტაცია.

პროფესორი პარმენ ლემონჯავა კითხულობდა ლექციებს ივ. ჯავახიშვილის სახელობის თბილისის სახელმწიფო უნივერსიტეტში და კითხულობს დღესაც საქართველოს პოლიტექნიკურ უნივერსიტეტში და რესპუბლიკის სხვადასხვა უმაღლეს სასწავლებლებში ეკონომიკური თეორიის, ეკონომიკის პრინციპების, ბუნების გამოყენების ეკონომიკის, ეკონომიკური, ეკოლოგიური პოლიტიკის კურსებს.

დიდია პროფესორ პარმენ ლემონჯავას დამსახურება რესპუბლიკის უმაღლეს სასწავლებლებში ბუნების გამოყენების ეკონომიკის სასწავლო კურსად ჩამოყალიბების პროცესში. პირველად მისი ინიციატივით ჩამოყალიბდა ბუნების გამოყენების ეკონომიკის კურსი და ამავე სახელწოდებით შექმნილ იქნა ივ. ჯავახიშვილის სახელობის უნივერსიტეტში სპეციალობა „ბუნების გამოყენების ეკონომიკა“ და გამოშვებულია ამავე სპეციალობის რამდენიმე სპეციალისტი.

ბატონი პარმენი გამორჩეულია მეგობრებში ყურადღებითა და თავაზიანობით. არის საოცრად თავმდაბალი პიროვნება. ამასთან ერთად, სადაც საჭირო არის, პრინციპულიც. კარგი ავტორიტეტით სარგებლობს სტუდენტებსა და პროფესორ-მასწავლებლებს შორის.

ამჟამად პროფესორი პარმენ ლემონჯავა მუშაობს საქართველოს ტექნიკურ უნივერსიტეტში, არის ემერიტუსი და კითხულობს მისთვის ჩვეული ენერგიით ლექციებს.

ბატონი პარმენ ლემონჯავა საქართველოში ცნობილია, როგორც კეთილშობილი კაცური კაცი, რომლისთვისაც დამახასიათებელია დვთაებრივად მინიჭებული ყველასადმი სიყვარული. ის დღესაც უშურველად ახმარს მთელ ენერგიას ქართული ეკონომიკური მეცნიერების განვითარებასა და დროის მოთხოვნის მიხედვით კვალიფიციური სპეციალისტების მომზადებას.

პროფესორ პარმენ ლემონჯავას აქვს ტრადიციული ქართული ოჯახი, ჰყავს მეუღლე, შვილი და შვილიშვილები.

გულოცავთ პროფესორ პარმენ ლემონჯავას მის საიუბილეო თარიღს და ვუსურვებთ პირველ რიგში ჯანმრთელობას, დიდხანს სიცოცხლეს და ყველა სფეროში წარმატებას.

**ჟურნალის
სარედაქციო კოლეგია**



სოციალური ეკონომიკა

XXI საუკუნის აქტუალური პრობლემები

(ნომერ 5-6-ის დამატება)
ლექციების კურსი